



## Bolest nemara – uzroci i liječenje (Medina)

Hatib: dr. Abdullah ibn Abdurrahman el-Buajdžan

4. rebiul-ahir 1447. po Hidžri / 26. septembar 2025.

Hvala Allahu, Gospodaru svjetova. Njega hvalimo, od Njega pomoć i oprost tražimo, i Njemu se utječemo od zla naših duša i naših loših djela. Koga Allah uputi, niko ga u zabludu ne može odvesti, a koga On u zabludi ostavi, niko ga ne može uputiti. Svjedočim da nema drugog boga osim Allaha, Jedinog, Koji nema sudruga, i svjedočim da je Muhammed, sallallahu alejhi ve sellem, Njegov rob i poslanik, koji je dostavio poslanicu, ispunio emanet, savjetovao ummet, i ostavio ga na jasnom putu, čija je noć poput dana, i s kojeg neće skrenuti osim onaj koji sam sebi želi propast. Neka su Allahova milost, blagoslov, spas na njega, na njegovu časnu porodicu, ashabe, i sve one koji slijede njegovu uputu do Sudnjega dana.

Zaista je najistinitiji govor Allahova Knjiga, a najbolja uputa je uputa Muhammeda, sallallahu alejhi ve sellem. Najgore stvari su novotarije, svaka novotarija je zabluda, a svaka zabluda vodi u Vatru.

O vjernici, i sebi i vama oporučujem bogobožnost, ona je najbolja opskrba, a uz pokornost Allahu, ona je najbolja želja i najuzvišeniji cilj. Uzvišeni kaže: “O vjernici, bojte se Allaha onako kako se treba bojati i umirite samo kao muslimani.” (Ali Imran, 102)

“O vjernici, Allaha se bojte, i neka svaki čovjek gleda šta je za sutra pripremio i Allaha se bojte jer On dobro zna šta radite.” (El-Hašr, 18)

Poštovani vjernici! Ljudska duša po svojoj prirodi naginje zlu, sklona je strastima i užicima, a lijena je za dobra djela i pokornost. Ona se mijenja, koleba, zavisno od prilika i događaja. Zato joj je potrebna stalna briga, odgoj i čišćenje. Uzvišeni kaže: “A onome koji je pred dostojanstvom Gospodara svoga strepio i dušu od prohtjeva uzdržao Džennet će boravište biti sigurno.” (En-Naziat, 40–41)





Srca ljudi brzo se mijenjaju i preokreću. Poslanik, sallallahu alejhi ve sellem, rekao je: “Srce čovjeka prevrće se brže nego što se voda u loncu prevrće kada vrije.” (Ahmed)

Šehr ibn Havšeb rekao je: “Upitao sam Ummu Selemu, radijallahu anha: ‘Majko pravovjernih, koju je dovu Allahov Poslanik, sallallahu alejhi ve sellem, najčešće učio?’, a ona je odgovorila: ‘Najčešće je učio dovu: O Ti koji preokrećeš srca, učvrsti moje srce u Svojoj vjeri.’” Kada ga je upitala zašto baš ovu dovu, rekao je: “Nema čovjeka a da njegovo srce nije između dva Allahova prsta, pa koga želi, On učvrsti, a koga želi, učini da skrene s Pravog puta.” (Tirmizi)

O muslimani, jedna od najvećih nedaća koja može zadesiti čovjeka u njegovom životu jeste nedaća koja mu upropaštava život, rasipa dragocjeno vrijeme, iscrpljuje snagu, umrtvljuje srce, uskraćuje mu svako dobro i ono poželjno, i sprečava ga da postigne ono što mu je potrebno. Ta nedaća zove se gaflet. A znate li šta je gaflet? Gaflet je okretanje od bogobožnosti i pokornosti Allahu, od cilja zbog kojeg nas je Allah stvorio, i od pripreme za susret s Allahom i polaganje računa.

Gaflet je nemar, nebriga o propisanim obavezama i zaborav na svrhu svog stvaranja; zbog njega se rasipaju snage, gubi vrijeme, i život prolazi u onome što ne koristi. Nemarnost je velika nedaća, ogromna katastrofa, ona udaljava čovjeka od njegovog Gospodara, sputava ga na putu kojim ide, zabavlja ga njegovim grijesima, pa ne mari za nevolje i kazne koje ga okružuju.

Nemarnost je mračno more, uzburkani valovi, iz kojih se spašavaju samo oni koji su oprezni. Uzvišeni Allah kaže: “...ali mnogi ljudi su ravnodušni prema Našim poukama” (Junus, 92); “...ali većina ljudi ne zna; oni znaju samo spoljašnju stranu života na ovome svijetu, a prema onome svijetu su ravnodušni” (Er-Rum, 6–7).

Šejtan koristi gaflet da čovjeka postepeno odvede u provaliju udaljenosti od Allaha, od ostavljanja sunneta i lijenosti u izvršavanju preporučenih djela do zanemarivanja farzova, i od ustrajavanja u pokuđenim stvarima do činjenja zabranjenih stvari i od relativiziranja malih grijeha do činjenja upropaštavajućih grijeha, da nas Allah sačuva toga. Zato je obaveza da se čuvamo nemarnosti, da joj ne podlegnemo, niti da se





preпустimo njenom putu. Uzvišeni Allah kaže: "I spominji Gospodara svoga ujutro i navečer u sebi, ponizno i sa strahopoštovanjem i ne podižući jako glas, i ne budi bezbrižan." (El-A'raf, 205)

O vjernici, oživite svoja srca zikrom – spominjanjem Allaha, čuvajte se nemarnosti i tvrdoće srca, budite bogobožni i izbjegavajte ono što je Allah zabranio.

O ljudi, šejtanske vesvese (došaptavanja, navođenje na zlo) su iskušenje koje je određeno, a zaborav i lijenost mogu proizaći iz ljudske slabosti, međutim, ustrajavanje u tome i prepuštanje tome jeste nemarnost i opasnost. Zato, kada vjernika obuzme nemarnost, treba odmah da se vrati svome Gospodaru, da traži oprost za svoj grijeh, da se utječe Allahu od šejtana, odbaci njegove vesvese i probudi svoje srce iz nemarnosti, prije nego što šejtan nad njim zavlada.

Uzvišeni kaže: "A ako šejtan pokuša da te na zlo navede, ti potraži utočište u Allaha, On uistinu sve čuje i zna. Oni koji se Allaha boje, čim ih sablazan šejtanska dodirne, sjete se, i odjednom dođu sebi, dok prijatelje šejtanove šejtani podržavaju u zabludi i oni ne dolaze sebi..." (El-A'raf, 200–202)

Gaflet je jedna od najvećih nesreća, koje mogu zadesiti čovjeka, i kada ovlada srcem, uništava vjeru i dunjaluk. On zasljepljuje čovjeka, odvaja ga od istine i upropaštava njegov život. Čovjek pod utjecajem gafleta stalno odgađa pokajanje i pokornost Allahu, misleći da ima vremena, a ne zna da život brzo prolazi, dani nestaju, a prilike se ne vraćaju.

Jedan od najvažnijih uzroka nemarnosti jeste nedostatak svijesti o Allahovom nadzoru i nepripremljenost za susret s Njim. Uzvišeni kaže: "Onima koji ne očekuju da će pred Nas stati i koji su zadovoljni životom na ovome svijetu, koji su u njemu smireni i onima koji su prema dokazima Našim ravnodušni – prebivalište njihovo bit će Džehennem, zbog onoga što su radili." (Junus, 7–8)

Među glavnim uzrocima nemarnosti jeste besposlenost, nebriga i necijenjenje vremena; čovjek živi bez cilja i rasipa život besmisleno. Ibn Mesud, radijallahu anhu, prenosi da je Poslanik, sallallahu alejhi ve sellem, rekao: "Većina ljudi nemarna je





prema dvjema blagodatima: zdravlju i slobodnom vremenu.” (Buhari) Poslanik, sallallahu alejhi ve sellem, rekao je: “Čovjekova stopala neće se pomjeriti na Sudnjem danu sve dok ne bude pitan o svom životu – kako ga je proveo, i o svojoj mladosti – kako ju je iskoristio.” (Tirmizi)

Još jedan važan uzrok nemarnosti jeste druženje s nemarnim ljudima i onima koji su zaokupljeni zabavom, jer čovjek je, po svojoj prirodi, sklon da se povodi za onima s kojima se druži i s kojima provodi vrijeme. Zato je Allah naredio Svome Poslaniku: “Budi čvrsto uz one koji se Gospodaru svome mole ujutro i navečer u želji da naklonost Njegovu zasluže, i ne skidaj očiju svojih s njih iz želje za sjajem u životu na ovome svijetu, i ne slušaj onoga čije smo srce nehajnim prema Nama ostavili, koji strast svoju slijedi i čiji su postupci daleko od razboritosti.” (El-Kehf, 28)

Jedan od najvećih uzroka nemarnosti u ovom vremenu jeste zaokupljenost uređajima i ekranima, trošenje vremena na zabavu i ono što odvlači pažnju i vezivanje za smutnje i strasti koje se prenose putem njih. Koliko je srca potamnilo zbog onoga što gledaju, i koliko je vremena izgubljeno u praćenju onoga čime Allah nije zadovoljan, do te mjere da mnogi više ne nalaze vremena za učenje Kur’ana, prisustvovanje predavanjima, niti za iskreno obraćanje Allahu u samoći. Allah nas je upozorio na takvo stanje: “Ljudima se bliži čas polaganja računa njihova, a oni, bezbrižni, ne mare za to. I ne dođe im nijedna nova opomena od Gospodara njihova kojoj se, slušajući je, ne podsmjehuju srca rasijanih. A mnogobošci govore šapatom: ‘Da li je ovaj nešto drugo do čovjek kao i vi? Zar ćete slijediti vradžbinu, a vidite da jest?’” (El-Enbija, 1–3)

Najbolji način da se čovjek oslobodi nemarnosti jeste bogobojaznost, iskreno okretanje Allahu, žurno pokajanje, ostavljanje grijeha, vraćanje prava njihovim vlasnicima, nadoknada propuštenih obaveza, trud u dovi, odlučna borba protiv vlastite duše i njeno preispitivanje. Pametan je onaj koji preispituje sebe i radi za ono što dolazi poslije smrti, a nemoćan je onaj koji slijedi svoje strasti i nada se Allahovoj milosti. Preispitajte sebe prije nego što budete polagali račun, izvagajte svoja djela prije nego budu vagana, jer lakše će biti na Sudnjem danu ako se danas preispitate.





Pripremite se za veliko izlaganje pred Allahom: “Tada će ispitivani biti, i nijedna tajna vaša neće sakrivena ostati” (El-Hakka, 18).

O muslimani, jedno od najvećih i najbolnijih iskušenja jeste gubitak učenjaka. Islamski ummet pogođen je smrću jednog od velikih učenjaka i plemenitih daija, šejha Abdulaziza ibn Abdullaha Alu Šejha, muftije ovih krajeva. On je, Allah mu se smilovao, živio u službi islama i muslimana, imao je istaknutu ulogu u izdavanju fetvi, vođenju i savjetovanju ummeta, širenju znanja, noseći brigu o vjeri, usmjeravajući ljude, i trudeći se za postizanje jedinstva riječi i redova. Molimo Allaha da ga obaspe Svojom obilnom milošću i da ga uzdigne na najveće stepene, sa vjerovjesnicima, iskrenima, šehidima i dobrima.

Donosite salavate na Poslanika, sallallahu alejhi ve sellem, podarenu milost i nepresušnu blagodat, to vam je naredba od vašeg Gospodara, Koji je objavio: “Allah i meleki Njegovi blagosiljaju Vjerovjesnika. O vjernici, blagosiljajte ga i vi i šalžite mu pozdrav!” (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

